

SOALAN NO: 35

**PEMBERITAHUAN PERTANYAAN DEWAN RAKYAT  
JAWAPAN OLEH YB DATUK SERI DR. S. SUBRAMANIAM  
MENTERI KESIHATAN MALAYSIA**

**PERTANYAAN : LISAN  
DARIPADA : TUAN HAJI NASRUDIN BIN HASSAN  
[ TEMERLOH ]  
TARIKH : 28 MAC 2018  
SOALAN : 35**

**Tuan Haji Nasrudin Bin Hassan [Temerloh]** minta **MENTERI KESIHATAN** menyatakan pendirian terhadap pengenalan semula rokok 'kiddie pack' dan langkah bagi mencegah kemasukan rokok tersebut ke dalam negara.

**Tuan Yang di-Pertua,**

Kementerian Kesihatan Malaysia (KKM), menerusi Peraturan-Peraturan Kawalan Hasil Tembakau 2004 telah pun mengharamkan sebarang penjualan pek rokok yang mengandungi kurang dari dua puluh (20) batang rokok atau *Kiddie Pack*. Larangan ini berkuatkuasa bermula pada tahun 2008 dan rokok *Kiddie Pack* adalah rokok tidak sah di Malaysia.

Larangan ini adalah selaras dengan komitmen kerajaan kepada Artikel 16(3) *World Health Organisation Framework Convention on Tobacco Control* (WHO FCTC) iaitu "***Sales to and by minor: Each party shall endeavour to prohibit the sales of cigarettes individually or in a small packets which increase the affordability of such products to minors***".

Malaysia merupakan antara negara-negara ASEAN terawal yang telah melarang penggunaan rokok *Kiddie Pack* selepas Brunei, Singapura dan Loa PDR. Laporan *Global Tobacco Report* setiap dua tahun bagi implementasi Artikel 16 (3) juga telah mencatatkan peningkatan negara-negara anggota dalam melarang penggunaan rokok *Kiddie Pack*. Laporan terkini pada tahun 2016 menunjukkan 71 negara telah melarang penggunaan rokok *Kiddie Pack* berbanding 68 negara pada tahun 2014.

Kajian yang telah diterbitkan di dalam *Journal Addiction 2013*, *BMJ 2013* dan *Paed Adolescent* tahun 2007 menunjukkan rokok *Kiddie Pack* menarik perhatian golongan remaja dan seterusnya meningkatkan penglibatan remaja kepada tabiat merokok. Kajian yang dijalankan oleh *Wood M and Levy J Malboro 10' In depth Interview* menunjukkan remaja akan tertarik dengan rokok *Kiddie Pack* kerana harga yang mampu dimilik.

Melalui siri kajian *Global Youth Tobacco Survey* yang dijalankan prevalen merokok di kalangan remaja di Malaysia telah menurun daripada 20.2% pada tahun 2003 kepada 18.2% pada tahun 2009 dan seterusnya kepada 14.8% pada tahun 2016. Ini bermaksud penguatkuasaan larangan penjualan rokok *Kiddie Pack* merupakan salah satu faktor utama kepada penurunan prevalen yang ketara di Malaysia.

Selain risiko peningkatan kadar perokok remaja akibat kebolehdapatan rokok, pengenalan semula rokok *Kiddie Pack* hanya akan menyebabkan perokok dewasa bertukar kepada rokok konvensional. Ini akan menyukarkan usaha pihak KKM untuk menurunkan peratusan merokok sepertimana komitmen Malaysia kepada Pertubuhan Kesihatan Sedunia (WHO) di bawah WHO NCD *Global Target* iaitu penurunan sebanyak 30% perokok.

Oleh yang demikian, KKM berpendirian untuk TIDAK BERSETUJU dengan pengenalan semula bungkusan rokok *Kiddie Pack* kerana ia adalah bertentangan dengan dasar perjanjian yang telah ditandatangani oleh Kerajaan Malaysia dan juga akan menyebabkan peratusan remaja dan kanak-kanak sekolah untuk merokok meningkat.

Untuk makluman YB Temerloh, rokok *Kiddie Pack* yang merupakan rokok tidak sah perlu ditangani dengan strategi yang lebih ketat terutama penguatkuasaan di pintu-pintu masuk negara.

Pertubuhan Kesihatan Sedunia (WHO) telah menjalankan kajian terperinci dan telah membincangkan masalah penggunaan rokok tidak sah. Pada tahun 2012 di bawah WHO FCTC, satu protokol antarabangsa iaitu *Protocol To Eliminate Illicit Trade In Tobacco Products* bagi kawalan strategik terhadap rokok tidak sah telah dibangunkan. Kerajaan Malaysia perlu memperketatkan lagi kawalan rokok tidak sah termasuk *Kiddie Pack* selari dengan Artikel-Artikel yang telah disarankan di bawah protokol ini.

**SOALAN NO.36**

**PEMBERITAHUAN PERTANYAAN DEWAN RAKYAT**

**PERTANYAAN : LISAN**

**DARIPADA : YANG BERHORMAT TUAN AHMAD MARZUK  
BIN SHAARY [ BACHOK ]**

**TARIKH : 28 MAC 2018**

**SOALAN :**

**YB Tuan Ahmad Marzuk Bin Shaary [ Bachok ]** minta **PERDANA MENTERI** menyatakan jumlah permohonan dan jemputan Kerajaan kepada badan-badan pemerhati/pemantau pilihan raya antarabangsa bagi Pilihan Raya Umum ke-14. Apakah syarat-syarat yang dikenakan oleh pihak Kerajaan terhadap badan pemerhati pilihan raya.

**JAWAPAN: YB DATO' SRI AZALINA BINTI OTHMAN SAID,  
MENTERI DI JABATAN PERDANA MENTERI.**

Tuan Yang di-Pertua,

Untuk makluman Ahli Yang Berhormat, berdasarkan kepada peruntukan undang-undang pilihan raya sedia ada, tiada peruntukan yang menyatakan bahawa Suruhanjaya Pilihan Raya (SPR) perlu mengundang pasukan pemerhati pilihan raya yang bebas daripada mana-mana organisasi baik tempatan mahupun antarabangsa.

Walaupun bagaimanapun, bagi tujuan memperlihatkan ketelusan proses pilihan raya yang dilaksanakan di Malaysia pada Pilihan Raya Umum Ke-13 (PRU Ke-13), SPR telah menjemput pemerhati antarabangsa daripada 4 buah negara ASEAN yang terdiri daripada Badan Pengurusan Pilihan Raya (*Election Management Bodies – EMB's*) iaitu negara Thailand, Indonesia, Myanmar dan Kemboja serta pihak Sekretariat ASEAN. Manakala bagi pemerhati tempatan, SPR telah melantik 17 badan bukan Kerajaan (NGO) Malaysia bagi membantu SPR memerhatikan proses pilihan raya di seluruh negara.

Untuk makluman Ahli Yang Berhormat juga, SPR akan menjemput pemerhati antarabangsa dari negara-negara Komanwel, Eropah, Asia dan ASEAN yang terdiri daripada wakil Badan Pengurusan Pilihan Raya negara-negara tersebut. Selain itu, SPR juga akan menawarkan kepada NGO yang berkecuali dan mana-mana organisasi yang berkelayakan sebagai pemerhati tempatan. Justeru, SPR sentiasa mempertimbangkan

permohonan daripada pihak-pihak yang berkaitan tertakluk kepada dasar dan keputusan SPR mengikut keperluan semasa.

Di antara syarat-syarat untuk menjadi pemerhati pilihan raya adalah:

- (a) berkecuali;
- (b) pemerhatian yang telus dan adil;
- (c) penambahbaikan sistem pilihan raya di negara ini; dan
- (d) berkeupayaan untuk mematuhi perundangan negara ini.

Sekian, terima kasih.